

Vun driweriver

erscheint auf www.lenauheim.de

monatliche
Erscheinung

Dezember 2015

von Helen Alba

Vor un zruck gedreht

In dem Herbscht wars mol wieder soweit, dass mer die Uhr zruckdrehe han misse. Des geht jetz schun seit Johre so un mer han uns dran gewehnt, wisse, dass die Uhr im Fruhjohr vor un im Herbscht um e Stund zruck gedreht git.

Bei uns derhem is es schun immer so gewenn, dass ich e Owet vorher an alli Uhre, die mer im Haus han, gedreht han. Ausser beim erschi Mol. Selmols war des dann e Lehr gewenn. Des war so:

Samschtachs owets han ich die Uhr um e Stund vorgedreht. De Sunntach is vill zu schnell rumgang. Weil mer nohmittachs spaziere gang sin un nit die Nachrichte gschaut oder ghorcht han, sin mer wie gewöhnlich um elf Uhr schlofe gang. De Wecker war eingestellt for um sechs Uhr rapple, mir sin jo selmols noch in die Arweit gang. Erschter sin ich ausm Haus. Es war noch stockdunkl, doch han ich mer nix drauss gemacht un gedenkt: des kummt halt vum Drehe. Die Bushalterstell war leer, was mer schun e bissl komisch vorkumm is. Selmols hats jo noch ke elektronische Tafle in de Halterstelle gin. Un ach ke Händi-Telefone. Es sin weder Leit beikumm noch war was vun eem Bus zu gsiehn. Des alles is mer spanisch vorkumm.

Ufmol han ich mer gedenkt, dass do etwas nit stimme tut. Weil die Bushalterstell grad vor unsrer Haustier is, han ich mich entschloss, ich geh zuruck un dreh mol es Radio an. Derhem war mei Mann a schun ausgefertich. Jetz han ich ne mol gfroot, ob ach er amend an de Uhre rum gewurschtelt hat. Trucke saat er: „Na sicher han ich gedreht, doch weess ich jetz gar nimi, ob ich vor oder zruck gedreht han!“

Mir drehe demoment es Radio an. Anstatt siewe Uhr am Morjet han die jo ingsaat, es sei fünf Uhr. Mir han mol gut gelacht un derezeit tun nor noch ich an de Uhre drehe!

Zum erschte un letschte Mol

Mer heert doch, wu mer jetzer hin un naus kummt, die Leit esse gheere „Schaorma“. Bisher han ich mer nit vill draus gemacht un gedenkt: Ohrfeije un Gschmäcker sin halt verschieden. Nitemol uf die riesengroße Plakate, die iwerall in dere Stadt for des Gfraß Werbung mache, han ich druf gschaut.

Bis doneilich. Ich sin hundsmed aus der Stadt kumm. Derhem limmelt mei bessri Hälft im Sessl un kummentiert: „Wu hascht dich dann soooo lang rumgetrieb? Hascht vergesst, uf die Uhr zu schaue? Ich war hungrich un han halt zu Mittach Kaltes gess. Brauchscht der ke Kocherei me anfang!“ Des han ich zwar gar nit im Sinn ghat. Doch de Hunger war groß un de Eiskaschte ziemlich leer. Also saan ich meim Mann, er soll doch so lieb sin un bis nuner ins Gschäft gehn, dort kriet mer allerhand Fertichgerichte. Brav wie immer hat er sei Zecker ghol un is je.

Wie er zruck kumm is han ich, heiss hungrich wie ich war, em de Zecker bal aus der Hand geriss. Drin war nix anres wie so e „Schaorma“. Hat ke Sinn ghat, jetz zu streite anfang. Also sin ich driwert hergfall. Schun beim erschte Bisse han ich die Schniss verzoo. Doch nix gsaat. Jetz froot mei Mann, obs mer dann nit schmecke tut. Nee, es hat mer gar nit gschmeckt. Drin ware allerhand neimodischi Soße un es Fleisch war härter wie e Knoche. Ich han an dem Zeich rum gemurkst, endlich war alles verdrickt un ich han Wasser trinke misse. Erscht dernoh is die Liternei kumm: „Weescht was? Sowas will ich nimi gsiehn. Des tät nitemol e Katz oder e Hund han wille. Liewer ess ich Fettbrot!“